

Ո Ր Ո Շ ՈՒ Մ

Ճանապարհային ոստիկանության վարչական տույժ նշանակելու մասին 11.12.2018թ. թիվ 1808877571 որոշումն անփոփոխ, իսկ վարչական բողոքն առանց բավարարման թողնելու մասին

<<30>> 01 2019թ. 17-13-5747-19/17-13-334

ք.Երևան

Ճանապարհային ոստիկանության պետ, ոստիկանության գնդապետ Ե. Կարապետյանս, վերանայելով Կառլեն Հովսեփյանի դիմումի քննարկման արդյունքում ստեղծված նյութերը՝

Պ Ա Ր Զ Ե Ց Ի

Երևան քաղաքի Ռոստոմի փողոցի 29 շենքի 33 բնակարանի բնակիչ Կառլեն Հովսեփյանը Ճանապարհային ոստիկանությանը հասցեագրած դիմումով խնդրել է վերանայել վարչական տույժ նշանակելու մասին 11.12.2018թ. թիվ 1808877571 որոշումը և նվազեցնել նշանակված վարչական տուգանքի չափը՝ նշելով, որ թռակառու է և իրավախախտումը կատարել է ոչ թե 25.11.2018թ. ժամը 12:53-ին, այլ նույն օրը ժամը 11:53-ին: Բացի այդ դիմումի պահանջը չբավարարելու դեպքում խնդրել է նշանակված տուգանքի գումարի վճարումը տարաժամկետել 6 ամսով:

Դիմումի քննարկման արդյունքում պարզվել է, որ վարչական բողոքը ենթակա է մերժման՝ հետևյալ պատճառաբանությամբ:

ՀՀ կառավարության <<Ճանապարհային երթևեկության կանոնները և տրանսպորտային միջոցների շահագործումն արգելող անսարքությունների ու պայմանների ցանկը հաստատելու մասին>> թիվ 955-Ն որոշման 7-րդ կետի 3-րդ ենթակետի համաձայն՝ **դեղին ազդանշանն արգելում է երթևեկությունը** (բացառությամբ կանոնների 19-րդ կետով նախատեսված դեպքի) և նախազգուշացնում ազդանշանի առաջիկա փոփոխման մասին, իսկ նույն որոշման 7-րդ կետի 5-րդ ենթակետի, **լուսացույցի կարմիր ազդանշանն, այդ թվում նաև՝ թարթող, արգելում է երթևեկությունը:**

ՀՀ կառավարության <<Ճանապարհային երթևեկության կանոնները և տրանսպորտային միջոցների շահագործումն արգելող անսարքությունների ու պայմանների ցանկը հաստատելու մասին>> թիվ 955-Ն որոշման 18-րդ կետի համաձայն՝ **լուսացույցի (բացի դարձափոխայինից) կամ կարգավորողի արգելող ազդանշանի դեպքում վարորդը պետք է կանգ առնի «Կանգ-գիծ» գծանշման (կամ 6.16՝ «Կանգ-գիծ» նշանի) առջև, իսկ դրա բացակայության դեպքում՝ հատվող երթևեկելի մասի առջև՝ հաշվի առնելով կանոնների 93-րդ կետը, խոչընդոտ չստեղծելով հետիոտների համար, ինչպես նաև այլ վայրերում՝ լուսացույցի կամ կարգավորողի առջև՝ խոչընդոտ չստեղծելով թույլատրելի ուղղություններով երթևեկող տրանսպորտային միջոցների և հետիոտների համար:**

Իրավախախտման PIN անհատական ծածկագրի տակ գետեղված տեսանյութի դանդաղեցված և դրվագային ուսումնասիրությամբ ակնհայտ է դառնում այն փաստը, որ դիմումատուի կողմից 25.11.2018թ. ժամը 12:53-ին Ամիրյան - Զաքիյան - Քոչինյան փողոցների խաչմերուկի հատվածում <<Կանգ-գիծ>> գծանշումը հատելու պահին միացված է

եղել լուսացույցի կարմիր արգելող ազդանշանը: Վերը նշված փաստերի վերլուծության արդյունքում **դիմումատուի կողմից 25.11.2018թ. ժամը 12:53-ին իրավախախտում կատարած լինելու փաստը կասկած չի հարուցում:**

Ինչ վերաբերվում է դիմումատուի **խնդրանքին՝** վարչական տուգանքի չափը նվազեցնելուն, ապա ՀՀ Սահմանադրության 6-րդ հոդվածի 1-ին մասի համաձայն՝ պետական և տեղական ինքնակառավարման մարմիններն ու պաշտոնատար անձինք իրավասու են կատարելու միայն այնպիսի գործողություններ, որոնց համար լիազորված են Սահմանադրությամբ կամ օրենքներով, իսկ սույն դեպքում Վարչական իրավախախտումների վերաբերյալ ՀՀ օրենսգրքով սահմանված է միայն մեկ սանկցիա՝ տուգանք, ուստի խնդրանքը բավարարել հնարավոր չէ:

Դիմումատուն 25.12.2018թ. թիվ 135671-18 դիմումով նախկինում արդեն դիմել է 11.12.2018թ. թիվ 1808877571 որոշմամբ նշանակված վարչական տուգանքի գումարի վճարումը 6 ամսով տարաժամկետելու խնդրանքով, ինչը 26.12.2018թ. բավարարվել է:

Այսպիսով, դիմումատուի արարքում ակնհայտ է Վարչական իրավախախտումների վերաբերյալ ՀՀ օրենսգրքի 124.3-րդ հոդվածի 2-րդ մասի զանցակազմը, հետևաբար նրան վարչական պատասխանատվության ենթարկելու մասին որոշումն իրավաչափ է և օրինական:

Ելնելով վերոգրյալից և ղեկավարվելով Վարչական իրավախախտումների վերաբերյալ ՀՀ օրենսգրքի 293-րդ հոդվածի 1-ին մասի 1-ին կետով՝

Ո Ր Ո Շ Ե Ց Ի

1. Ճանապարհային ոստիկանության վարչական տույժ նշանակելու մասին 11.12.2018թ. թիվ 1808877571 որոշումը թողնել անփոփոխ, իսկ վարչական բողոքն առանց բավարարման:
2. Սույն որոշումն ուժի մեջ է մտնում հանձնելու օրվան հաջորդող օրը և կարող է բողոքարկվել ՀՀ վարչական դատարան՝ օրենքով սահմանված կարգով և ժամկետներում:
3. Սույն որոշման օրինակն ուղարկել Կառլեն Հովսեփյանին:

Կատարող՝ Կ. Սուքիասյան



Ե. Կարապետյան